



35

QUÆSTIO MEDICA,

QUODLIBETARIIS DISPUTATIONIBUS,
manè discutienda in Scholis Medicorum,
die Veneris septimâ Januarii.

M. CLAUDIO QUIQUEBEUF,
 Doctore Medico, Præside.



An quæ frigido sunt Utero, concipiunt?

I.

VIVENS quodlibet semel occidere necessum est; seriùs, ocyùs pro varia temperie. Hanc lethi necessitatem compensavit natura mirâ procreandi libidine, quam cunctis insevit animantibus. Ne tamen putes perire quidquam. Nihil emoritur, sed ultrò citròque transpositum, formam perdit priorem, ut acquirat novam. Eam ob rem divisus uterque sexus; pars una puellis, una viris genita est, cujus ope gens humana quodammodò perpetua fit & æterna. His in partibus si desint caloris blanditiæ, seminum prolifica vis exstinguitur.

MULIER propter Uterum mulier. Is non unâ contextus tunicâ, venis & arteriis irrigatur; jacet in imo ventre reconditus; ubi semel hausit parentum semina, undique sese contrahit, ut illa suo foveat calore, diducat ope fermenti: diductam hanc generationis materiem spiritus intûs agitât: tûm evolvuntur seminales particulæ, quæ priûs erant confusæ: Exilit una quæque, partes effictura similes iis à quibus decesserant: quæ à corde, quæ ab hepate parentum effluerunt, eadẽ in sobole efformant viscera. Hæc à materno sanguine mox appellente capiunt incrementum. Sic à motu & calore vita ducit exordium.

I I I.

QUID QUID igitûr in mundo extra mundi opificem, & animam rationalem, constat ex materie, huic & ipse homo debet originem, non ab ovo, sed à puro semine repetendam. Salax iste liquor in Utero solo depositus sit corpus humanum; sic chylus in ventriculo, sanguis in vasis, spiritus in cerebro conficiuntur. Nec ullibi quam in Utero reperias Uteri fermentum; ab eo quoque promoveri putes menstrui sanguinis excretionem, non per venas, sed per arterias. Et velût gelidis in locis, nec massa fermentescit, nec arbores frugiferæ; sic iners est ζύμωσις in vulva frigidiore; sic in eadẽ desiderantur κατὰ μέρη, conceptio.

I V.

CALOR cum fermento παντοκράτωρ: ille communis est omnibus viventium partibus, hoc peculiare singulis. Utroque si pollet fundus muliebris, brevi, tibi sponsa jactabit prægnantis Uteri pompam, tibi speranda nuptiarum messis & socialis pignus amoris. Annorum decursu ubi primum minuitur caloris magisterium, ubi languet attrita vis fermenti, torpet statim & arescit Arvum muliebre, nec flores amplius, nec fructus Editurum. Pariter in junioribus, ante caloris ἐκλαμψιν, Uterum meritò dixeris adhuc inutile pondus.

V.

AT, dum floret ætas si friget Uterus; quam misera fors Conjugis! vivet illa sinè nomine, quia sinè sobole, ni citò quærat solatium; attendat igitur, Undè mali labes? quò domestico more degerit? quibus se paverit Cibis? Caveat ne quid in iis deliquerit sterilitate luendum. Meminerit, cur Aulicæ mulieres quæ totæ vel in Epulis, vel in aleâ: cur Urbanæ quas sola desidia fatigat, inter opes laborent inopiâ liberorum: quamobrem Rusticanæ continentes in victu, patientes in labore, numerosâ prole beentur. Effectuum tam dissidentium causa, non alia profectò, quàm dispar vivendi ratio. Exercitatione fove-

tur vivificus Uteri calor, otio torpet; parco victu recreatur, suffocatur abundantiori; hinc sterilitas, illinc fœcunditas. Sèd heu ! Si frigidioris Uteri vitiositas à naturâ, nulli fas sponsæ sperare prolis ornamentum, lugebit illa perpetuò calamitosissimam orbitatem.

Ergo quæ frigido sunt Utero, non concipiunt.

Domini Doctores disputaturi.

M. Amandus Dauté.

M. Joannes-Baptista Doye.

M. Claudius Puyton.

M. Franciscus Gössel.

M. Urbanus Leaulié.

M. Claudius Berger, Decanus.

M. Nicolaus Brunel de la Carlière.

M. Michael Pichonnat.

M. Dominicus de Farcy.

Proponcbat Lutetiæ Parisorum CAROLUS BOMPART, Claromontensis,
ex Arverniâ, Baccalaureus Medicus. A. R. S. H. 1695.

Apud Franciscum Muguet, Regis & Facultatis Medicinæ Typographum.